



**PARTORDING NI PARMINGGUON  
PESTA PARNINGOTAN  
ARI HANANAEK NI TUHAN JESUS**

📖 Ev: Lukas 24 : 44 - 53

📖 Ep: Psalmen 47 : 6 - 10

TOPIK :

**TARHINDAT JESUS TU GINJANG,  
MARLAS NI ROHA SITUTU MA HITA**



**Oikumene  
Inklusif**

*Orientasi Pelayanan  
HKBP 2024. **Mat 5:45***

**HURIA KRISTEN BATAK PROTESTAN  
KAMIS, 09 MEI 2024**

## 1. JOUJOU MAMUJI TUHAN I :

U: Huria na hinaholongan ni Tuhan Yesus Kristus. Nuaeng marlas ni roha do hita, manghalashon Pesta Parningotan Ari Hananaek ni Tuhan Yesus tu bangua ginjang. Ditogutogu ari parningotan on do hita tu panghirimon, paboa ndang portibi on ujung ni pardalanan ni angka na porsea di Tuhan i, alai surgo hasonangan i do.

H: ***Ale Jesus Kristus, di Ho ma tama pujipujian, hasangapon ro di saleleng ni lelengna.***

U: Tangkas ma tahaporseai Jesus na manaek tu surgo laho mangarade inganan di angka na porsea di Ibana, jala diarahon hita asa gabe sitindangi ni Kristus tu sandok portibi on. Ala ni i, di bagasan unduk dohot serep ni roha, tapahibul ma rohanta marparsaoran tu Tuhanta Jesus Ulubalang na gogo i. **Marende ma hita!**

## 2. Marende BE. HKBP No. 99 : 1 - 3 "O ULU BALANG NA GOGO" BL. 206

♫ *O Ulubalang na gogo songon sadari on do Ho manaek tu hasangapon Naung sidung do ulaonMi na ringkot patupaonMi humophop hajolmaon Sabam, tongam do Ho muli tu na uli marhabangsa di siamun ni Jahowa*

♫ *Marloksaloksa serapim marriburibu kerubim mamuji Ho na monang Dibaen naung pinadomuMi saluhut manisias i tu Debata di ginjang Puji, puji Jesus Kristus naung patulus saluhutna tinonahon ni AmaNa*  
----- **Jongjong** -----

♫ *O Jesus Ho do ulu ni saluhut na porsea i ruasMu anggo hami Ho hangoluannami on, Ho hasonangannami on, Ho hagagoonnami Suru, togu rohanami, asa hami mangalehon tu Ho nasa hasangapon*

## 3. VOTUM – INTROITUS – TANGIANG:

U: Marhitehite Goar ni Debata Ama, dohot Goar ni AnakNa Tuhan Yesus Kristus, dohot Goar ni Tondi Parbadia na tumompa langit dohot tano on. **Amen.** Songon on do didok Tuhan i : BahenonHu do sogot na monang i rap dohot Ahu hundul dihabangsangHi, songon Ahu na monang i jala hundul rap dohot Damang di habangsaNa i. **Haleluya!**

H: (Mangendehon): BE. HKBP No. 852 : 1 "HALELUYA HKBP (3X)

**BL. 852**

*♪♪♪ Haleluya... Haleluya... Haleluya.*

**U: Martangiang ma hita!**

Ale Tuhan Debata, Pargogo na so hatudosan. Sai pargogoi ma hami manghaporseai AnakMu na sasada i, Sipangolu hami, na manaek tu surgo, asa huparrohahon hami roha banua ginjang marhitehite Anak haholongan ni rohaM, Tuhan Jesus Kristus, Tuhannami. Amen.  
**( Hundul )**

**4. Marende BE. HKBP No. 637a : 1-2 “PATIMBUL MA HUASONI GOAR NI JESUS I” BL. 637a**

*♪♪♪ Patimbul ma huaso ni goar ni Jesus i,  
Pasangap ma Tuhanta i puji goarNa i  
Pasangap ma Tuhanta i, tapuji Jesus Tuhan i.*

*♪♪♪ Pangiar ma soaraMi, o parlangitan i  
Patimbul ma na monang i, puji goarNa i  
Patimbul ma na monang i, tapuji Jesus Tuhan i.*

**5. P A T I K :**

**U:** Tangihon hamu (Tatangihon) ma Patik ni Debata di Pesta Parningotan Ari Hananaek ni Tuhan Jesus sadari on i ma **Markus 16 : 15.** *Jadi ninna ma mandok nasida: “Laho ma hamu tu liat portibi on, jamitahon hamu ma Barita na Uli i tu nasa na tinompa”.* I do sahatna. Antong, rap mangido gogo ma hita sian Tuhan Debata!

**U+H:** Ale Tuhan Debata sai pargogoi ma hami mangulahon na hombar tu PatikMi. Amen.

**6. Marende BE. HKBP No. 172 : 1 - 2 “O JESUS PANONDANG” BL. 143**

*♪♪♪ O Jesus panondang di portibi on  
Mula ni na torang tangi hatangkon  
Sai asi rohaMu di pardosa on  
Ho ma mangapuli au na marsak on*

**----- Jongjong -----**

♫♫ *Sesa ma dosangku ale Tuhanki  
Ala ni mudarMu na nilehonMi  
Asal ma rohangku salelengna i  
Ingot di hansitMu dohot mudarMi*

## **7. MANOPOTI DOSA:**

**U: Tatopoti ma dosanta martangiang ma hita!**

Ale Tuhan Debata, na badia jala na bonar. Parasi jala Partalup ni roha jala na basar do Ho. Sai marpangulahi ma rohaM mida hami. Dibahen i sai sesa ma sude dosanami. Ndang adong na hupangasahon hami dungkon ni asi ni rohaM, hatigoran na pinatupa ni AnakMu do na hupangasahon hami tu joloM. Dibahen i pasonang jala apuli ma hami angka na hinophop ni Tuhan Yesus Kristus, Tuhannami. Amen.

**Bagabaga ni Debata taringot tu hasesaan ni dosa!**

Songon on do Hata ni Tuhan Jahowa: Nunga diarsahi ho Ahu marhite sian angka dosam, jala nunga dilojai ho Ahu marhite sian angka hajahatonmu. Ahu tutu, Ahu sandiri manalesei angka pangalaosim ala ni hadirionKu, jala ndang be hupaingotingot angka dosam. Hasangapon ma di Debata na di ginjang!

**U+H: Amen.**

**(Hundul)**

## **8. Marende BE. HKBP No. 638 : 1 – 2 “PATIMBUL TUHAN I” BL. 638**

♫♫ *Patimbul Tuhan i, di habangsaNa i  
Marhasak baen soarami mamuji Tuhan i  
Endehon ma rajaM sian sandok roham  
Naung mate ala ni dosam, oloi ma Debatam*

♫♫ *Patimbul Anak i, naung gabejolma i  
Na mangantusi arsakmi na pangoluhon i  
Dijangkon hita be, gabe jambarNa i  
Asa sonang hita muse, di adopanNa i*

## **9. EPISTEL:**

**U:** Tangihon hamu (Tatangihon) ma Hata ni Debata turpuk Epistel di Pesta Parningotan Ari Hananaek ni Tuhan Yesus sadari on, tarsurat

di **Psalmen 47 : 6 - 10**. Manaek do Debata mardongan parolopolopon, Jahowa mardongan soara ni sarune.

**H: Sai endehon hamu ma Debata! Sai endehon hamu ma Rajanta i! Endehon ma tutu!**

**U:** Ai Debata do Raja ni liat portibi on, endehon hamu ma ende sipodaon.

**H: Debata do mangarajai angka parbegu, hundul do Debata di atas habangsa habadiaonNa i.**

**U:** Marpungu do angka na sangap ni angka bangso tu bangso ni Debata ni si Abraham, ai Debata do nampuna angka lombulombu raja ni tano on, timbul situtu Ibana.

*I do sahatna. Martua do angka na tumangihon Hata ni Debata jala na umpeopsa.*

**U+ H: Amen.**

**10. Marende BE. HKBP No. 98 : 1 + 3 “NAUNG MANAEK DO HO” BL. 59**

♪♪♪ *Naung manaek do Ho lao tu surgo do*  
*Ale Jesus Rajanami, Ho do ihuthononnam*  
*Ho partogi i lao tu surgo i*

----- **Jongjong** -----

♪♪♪ *Suru ma tondiM singkat ni bohiM*  
*Tu bagasan rohanami manogihon tondinami*  
*Lao tu surgo i tu adopanMi*

**11. MANGHATINDANGHON HAPORSEAON:**

**U:** Tahatindanghon ma haporseaonta i, songon na hinatindanghon ni donganta sahaporseaon di sandok portibi on. Rap ma hita mandok!

**H: Ahu porsea di Debata Jahowa.... d.u** **(Hundul)**

**12. TINGTING :**

**13. Papungu Pelean Huhut Marende BE. HKBP No. 97 : 1 --- “INGOTON MA SADARI ON ” BL. 129 (Pelean Ia & Ib)**

♪♪♪ *Ingoton ma sadari on parnaek ni Tuhan Jesus*  
*Tu habangsaNa na tongtong na so tarbaen be meret*  
*Tasomba ma Tuhanta i naung mulak tu Amana i*

*Tapuji ma Ibana*

♪♪ Ai nunga mungkap dalan i di angka na porsea  
Lao mamongoti surgo i malua sian jea  
Naung mangonai tu sasude, na mangulahon dosa i  
Pinuji ma Tuhanta

**-----Musik-----**

♪♪ Ianggo las roham tutu di Jesus i Tuhanta  
Pauba ma roham burju ihuthon ma Ibana  
Oloi hataNa sasude, sai tiru pambaenanNa pe  
Saleleng ho mangolu

♪♪ Ai mulak do Tuhanta i di ari paruhuman  
Sai dabuonNa do disi sude parhajahaton  
Tu api na so mintop i, alai haholonganNa i  
Tu surgo bahenonNa

**-----Musik-----**

♪♪ O Jesus, Tuhannami on asi rohaM di hami  
Sai tatap hami na dison di paraloannami  
Patogu hami sasude, tumpahi hami monang be  
Ro di ujungna sogot

**14. J A M I T A : Lukas 24 : 44 - 53**

**15. Papungu Pelean Huhut Marende BE. HKBP No. 100 : 1 ---  
“MARDONGAN OLOPOLOP MANAEK TUHANTA I” BL. 155 (Pelean  
II)**

♪♪ Mardongan olopolop manaeK Tuhanta i  
Jinangkoni na torop surusuruan i  
Antong nang hita pe tapuji ma Tuhanta  
Marendeende hita, marolopolop be

♪♪ Na mulak do Tuhanta tu habangsaNa i  
Tu lambung ni AmaNa di siamunNa i  
Disomba sasude na di banuaginjang  
Tuhanta i na monang ro sian tano i

-----Musik-----

♪♪ Tatimbang ma lapangna umbaen na songon i  
Ai naeng ma dohot hita tumopot surgo i  
Antong taingot ma ianggo Tuhan Jesus  
Ibana do patulus nidok ni Debata

♪♪ Ditaon do hamatean, humophop hita on  
Pature pardalanan na sian tano on  
Manogu hita be tu lambung ni AmaNa  
Disi di adopanNa naeng sahat hita be

-----Musik-----

♪♪ I pe ringgas ma hita, mangalo dosa i  
Manggotap roha daging nang hajahatan pe  
Tahalungunhon be Tuhanta na di ginjang  
Ibana do na monang i ma tatiru be

♪♪ O Jesus Tuhannami, asi ma rohaMi  
Sai sesa dosanami palua hami be  
Pamasuk hami on tu hangoluan sogot  
Sai loas hami dohot mamuji Ho tongtong

**16. Tangiang Pelean – Tangiang Ale Amanami - Tangiang Pasupasu :**

**P : Tatangianghon ma peleanta.** Ale Debata, Amanami na di banua ginjang! Ho do haroroan ni saluhut silehonlehon na denggan dohot nasa ulibasa na mauiutus. Hupasahat hami ma sian na nilehonMi tu hami, peleannami tu Ho. Sai jalo ma i gabe uap na hushus di joloM. Pasupasu ma i jala ramoti asa huparhaseang hami pelean on, patimbulhon harajaonMu di tongatonga ni huriaM dohot di portibi on. Buhai ma rohanami marhitehite TondiM, asa lam hutanda hami godang ni silehonlehonMi tu hami, asa lam girgir hami mandok mauiate tu Ho, marhitehite Jesus Kristus Tuhannami. Amen.

**H : (Mangendehon)BE. HKBP No. 204 : 2 “NDANG  
TADINGHONONHU HO” BL 73**

*♪♪ Nasa na nilehonMi, tondi ro di pamatanghu  
Hosa dohot gogongki, ro di saluhut artangku  
Hupasahat i tu Ho, na so unsatonhu do.*

P : Ale Tuhan Yesus Kristus, naung manaek tu banua ginjang, na hundul di siamun ni Debata. Hasangapon dohot hamuliaon ma di Ho ro di saleleng ni lelengna. Na marlas ni roha do hami nuaeng ala naung monang Ho, jala dipabangkit Debata Ho gabe Raja di atas ni saluhut. Halongangan do sude dalamMu, ai dipatutoru Ho diriM tu toru ni saluhut, alai gabe tumimbo Ho sian sasude jala maruli Goar, asa lompit saluhut ulu no tot laho marsomba tu Ho, jala ganup pamangan marhatopothon : Ho do Tuhan.

Mauliate ma rohanami tu Ho, ala naung diungkap Ho dalam tu banua ginjang, gabe Sintua ni malim Ho, na mangondihon hami tu Debata. Sai pasupasu ma HuriaM, na maringanan dope di hasiangan on, paima marpungu hami tu lamnbungMu. Sai pasaut ma bagabagaM tu angka suruanMu. Lehon tu nasida sahala dohot hagagoon sian banua ginjang, asa marmulia GoraMu di portibi on.

Sai ajari ma angka partohonan di HuriaM, asa hombar tu lomo ni rohaM angka aturan, paminsangon dohot panogunogun na niaturhonnasida di HuriaM.

Sai gomgomi jala parentai ma saluhut HuriaM di sandok portibi on, asa lam rarat jala monang HuriaMi; lehon hapistaran sian banua ginjang tu angka induknami, tu angka Pandita, Guru, Biblevrow, Diakones, Sintua dohot Evangelis, asa lam maraturan HuriaM di tano on.

Sai pajongjong harajaonMu di bagasan rohanami, asa marhiras ni roha hami mangoloi dohot mangihuthon Ho. Pahot ma rohanami tu Ho, asa huhatindanghon hami, mangolu manang mate pe hami, Ho do Tuhannami. Sai paian ma HataM dohot dame di HuriaM, asa huingot hami, ndada hasiangan on inganannami, alai di banua ginjang di lambungMi do.

Sai ramoti ma na manggomgomi hami dohot suruan na pinabangkitna, lehon tu nasida hapistaran sian banua ginjang



dohot unduk ni roha, asa dohot nasida mangoloi parentaM. Pasupasu ma saluhut parpungan ni halak Kristen, sai Ho ma dongannasida jumpa marpungu di gareja, di parsikolaan, nang pe di bagasna be. Sai lam longkangi sian hami dosa dohot sude na pasorathon hami di hasiangan on, asa lam malungun hami, paimahon haroroM mangalap hami tu lambung ni Ama i. Amen.

Ale Amanami na di banua ginjang! Sai pinarbadia ma GoarMu! Sai ro ma harajaonMu! Sai saut ma lomo ni rohaM di banua tonga on songon na di banua ginjang! Lehon ma tu hami sadari on hangoluan siapari! Sesa ma dosanami songon panesanami di dosa ni dongan na mardosa tu hami! Unang hami togihon tu pangunjunan! Palua ma hami sian pangago!

**H : (Mangendehon): BE HKBP No. 841 : 1 “AI HO DO NAMPUNA HARAJAON” BL 841**

*♪♪♪* Ai Ho do nampuna harajaon, dohot hagagoon  
Ro di hasangapon, saleleng ni lelengna, Amen.

**P : Tangiang Pasupasu**

**H : (Mangendehon ) BE No. 845 : 1 “AMEN, AMEN, AMEN” BL 845**  
Amen, Amen, Amen